

Ya'a tse'e je muto'k nak juu' ve'e je Pablo tyuknuja'yi je Timoteo

1 Atse'e je Pablo, je Jesucristo je kyukátsiva, ve'em ax jo'n atse'e xtukpavaandi je Nte'yam, je nYaktsookpamda, jets je Jesucristo, juu' ve'e xmo'yumdap je y'oy je'e ku ve'e myiinnuvat. ²Timoteo, n'onukja'vipts ats mitse'e je'e kajx ku ve'e xjaanchja'vi'ukvaajñ je Jesucristo ku atse'e x'amotunajxy. Je Nte'yam, juu' ve'e nTee'imdup, jets je nMaja Vintsánamda Cristo Jesús, je'e tse'e mkunoo'kxjadap jetse'e m'ijtnit je tyukmo'tun maatta jets je y'oy joot maatta.

Ku je Pablo dupavaajñ jetse'e kyayakkuvákut je taay ixpajkun

³Tanu to'k aaj jem éfesovit kyajpun kajxm, ve'em ax jo'n ats mitse'e n'amotu ku atse'e jem ntsaa'n jets atse'e nnujxk Macedonia. Jem tse'e je jayu xtukpava'andat jets ka'a ve'e dutuk'ixtat je taay ixpajkun, ⁴ka'a tse'e dumajapámdat je kats juu' ve'e je jayu myutaayvaattu, ka'a tse'e dumajapaamduvat je may nak juu' jatye'e tyijtup jets vaamp je'e ve'e vintso ve'e je jupit jayu jyoointykidi. Koojyji xa je'e ve'e je jayu dyakmejtsvinmá y pan vintso

ve'e je Nte'yam je tyoo' y'ixuva; ni vinxúpats je'e ve'e kyaputákajada jetse'e dujaanchjávadat je Nte'yam je y'ayook. ⁵Je'e kajxts ya'a ve'e ya pava'nun juu' ats mitse'e uxyam ntuknuja'yip, jetse'e je jayu to'k aaj to'k joot dujaanchjávadat je Nte'yam je y'ayook, jetse'e je jayu dujayéptat je va'ajts aaj je va'ajts joot jets je va'ajts vinma'yun; je tsojkunts je'e ve'e yakjéjip. ⁶Jem xa ve'e je jayu juu' ve'e je tuvutoo' dumasooktinu, je'e tse'e myaajntyktup juu' ve'e katoomp, ⁷chojktupts je'e ve'e jetse'e je Moisés je pyava'nun je jayu dutukyak'ixpáktat, ax ni viinma tse'e dukavinmótuda juu' ve'e kyojtstup, nay ka'ava tse'e dunujávada ti ve'e tyijp je ixpajkun juu' ve'e tyun'ava'nidup jets tyúvam je'e ve'e.

⁸Nnuja'vimdup xa uu'me'e jets oy je'e ve'e je Moisés je pyava'nun ku ve'e yaktún ax jo'n pyuma. ⁹Nnuja'vimduvap tse'e jets ka'a ve'e je Moisés je pyava'nun yakpum jetse'e duyakkutojkjat je jayu juu' ve'e tuv jáyuvidup joojntykidup, je'e ve'eda pan pan jatye'e jomjáyuvidup tijáyuvidup,

jomjoojntykidup tijoojntykidup, pan pan jatye'e kakatsupajktup, je Nte'yam dukavintsá'kidup, tokintoondup, dukamajapaamdup je Nte'yam ukpu juu' ve'e je Nte'yam jye'e, je tyee' ukpu je tyaak ukpu je viijnk jayu duyak'oo'ktup, ¹⁰je navyajkun duyavintsá'kintókidup, je ko'oyyaa'yapta, je jayu mee'tspada, pan pan jatye'e taayidup, pan pan jatye'e je Nte'yam duyaknajxtup je taay kajx. Yakpaampa tse'e je Moisés je pyava'nun jyajuu'a juu' jatye'e viijnk juu' ve'e dutso'oxpajkp je va'ajts ixpajkun. ¹¹Je va'ajts ixpajkun tse'e dumaatnavyaatjup dumaatnay'akeeguijup je oy kats je oy ayook juu' ve'e ooy je majin dutunjayejpp jets atse'e je Kunuu'kx Nte'yam xtukkatajki.

Ku je Pablo je Jesucristo dukukojsji kuxe'e yaktukma't

¹²Nkukojsjipts atse'e je nMaja Vintsánamda Jesucristo kuxe'e ats xtukkatajki je toonk jets atse'e je myakkin kajx je jayu nvaajnjadat je oy kats je oy ayook. Ve'em tse'e dutuujn kux ñuja'vip je'e ve'e jets nkutyuump atse'e juu' je'e ve'e chajkp. ¹³Nujom atse'e ya maa'yun xtoojnji óyam ats je'e ve'e nyakvintsá'kintóki ku ats je'e ve'e nkajaanchjávana vye'na. Ax xtukmo'tts atse'e je Nte'yam je'e kajx ku atse'e ka'anum nmujava vye'na ti atse'e ntoon nkojts. ¹⁴Je Maja Vintsants atse'e xtoojnji ya maja maa'yun, je'e atse'e xmooyva je jaanchja'vin jets je tsojkun juu' ve'e njayejpumdup kuxe'e to'k muk n'ijtumda je Cristo Jesús maat.

¹⁵Tyúvam xa ya'a ve'e ya kats, pyaatyp y'akeeguipts je'e ve'e jetse'e anañujoma je jayu dujaanchjávadat, jets je'e kajxe'e je Cristo Jesús myiijn yaja naxviijn jetse'e duyaktso'okut je tókinax jáyuda, ats tse'e nuyojk tókinax jayu. ¹⁶Ax je'e kajxts atse'e je Nte'yam xtukma't kux je'e ve'e chajkp jets atse'e nyaknuke'xnatákat nuyojk jets ka'a ve'e je viijnk jayu joma vaate'e je Jesucristo juu' dukuvuk, je'e juu' atse'e ntuntso'oxpajk, je'e ve'e chajkp jets atse'e je nu'ixvaatsun nyaktánut je'e kajxta pan pan jatye'e je Jesús dujaanchjávadap, ve'em tse'e dujayejptuvat je joojntykin juu' ve'e xa'ma kajx ijtp. ¹⁷iYakmaja yakjaancha jets vintsá'aga tse'e y'ijtnit xa'ma kajx je tun to'k Nte'yam, juu' ve'e xa'ma kajx yakkutojknup, juu' ve'e ni vin'ita kavintókip, juu' ve'e kayak'ixp! Amén.

¹⁸Timoteo, n'onukja'vipts ats mitse'e. Ya'a juu' ats mitse'e tuntukpava'añ, pyaatyp y'akeeguipts je'e ve'e maat je Nte'yam je y'ayook juu' ve'e je utsta je ajchta kyojtsnajxtu mits kajx. Mputákajapts je'e ve'e juu' ve'e mkojtsuxjüdu jetse'e oy xmutónut xmupákut je Jesucristo jetse'e x'amaadaagat nujom juu' jatye'e ka óyap. ¹⁹Tonu tse'e ve'em je jaanchja'vin maat jets je va'ajts vinma'yun maat. Jeme'e juu' ve'e dukajaanchja'vidup kuxe'e dukamajapaamdi juu' ve'e je Espíritu Santo kyajtsp. ²⁰Ve'em xa ve'e jyajtti je Himeneo jets je Alejandro, je'eda juu' atse'e

mpaamdu jem je Satanás kya'm jetse'e yaktsaachpaa'tjadat, ve'em tse'e dunujáavadat jets ka'a ve'e je Nte'yam dvinokojtspéttat.

Je'e pan vintso ve'e chapkótstat

2 Muto'k viijn, je'e atse'e ntsajkp jetse'e je jayu je Nte'yam du'amótudat anañujoma je jayu kajxta, je Nte'yam dumukótstat, dumunoo'kxtuktat, jetse'e dukukojtsjadat. ²Ntsajkpts atse'e jetse'e dunutsapkótstat pan pan jatye'e yakkutojktup jets pan pan jatye'e je kajpun dunuvinténidup, ax ve'em tse'e oy aaj oy joot njoointykimdat, oy nmaajk'ijtumjadat je Nte'yam maat, jetse'e nto'numdat juu' ve'e pyaatyp y'akeeguij. ³Oy xa je'e ve'e ku ve'e ve'em yaknutsapkats, y'oyja'vipts je'e ve'e je nyaktsookpamda Nte'yam, ⁴kux je'e ve'e chajkp jetse'e anañujoma je jayu dujajeyptinit je joojntykin juu' ve'e xa'ma kajx ijtp jetse'e dunujáavadat je tyuv je'e. ⁵To'kji xa je'e ve'e je Nte'yam, to'kjiivats je'e ve'e pane'e o'yixjup jetse'e duyaknamyujot'óyajat je jayu jets je Nte'yam, je jayu Jesucristots je'e ve'e. ⁶Namyasookjuts je'e ve'e jetse'e y'uk'aa'k, ve'em tse'e dukuvejt anañujoma je jayu je tyokin. Ya'a tse'e nujava taan ku ve'e je Nte'yam dutsajk. ⁷Kux chajkpe'e jetse'e anañujoma je jayu dujajeyptinit je joojntykin juu' ve'e xa'ma kajx ijtp, je'e kajxts atse'e nyakpuujm ka'amaayva jets kukátsiva. Tyúvamts ya'a ve'e juu' atse'e nkajts, ka'a atse'e ntaaya, kukátsiva atse'e nyakpuujm jets

atse'e ntukyak'ixpáktat je tyuv je'e pan pan jatye'e ka je israeejlit jáyuvap jetse'e dujaanchjáavadat je Cristo.

⁸Ntsajkppts atse'e jetse'e je yaa'tyajk chapkótstat pan joma ve'e je jaanchja'vivatajk ñay'amókajada, je kya'aj duyakpojtuktat je va'ajts aaj je va'ajts joot maat, je jayu dukamu'ékjadat jetse'e je jayu dukamaatnakyojtsvintso'vjad at. ⁹Ntsajkppts atse'e jetse'e je ta'axtajk ñaxyóxjadat oy yaxón ax jo'n dupaa'ty du'akeega ax jo'n dvinmachju; ka je'epe'e ku ve'e je namyajin kajx dupamda je vyaajy je chojin ukpu je namyajin kajx dujajeypta je oro, je perlas, ukpu je tsóvax vit; ¹⁰je'e ve'e jetse'e je y'oy je'e dutóndat, ve'em ax jo'n dupaa'ty du'akeega jetse'e dutóndat je ta'axtajkta pan pan jatye'e vaandup jets vyinja'vidup vyintsakidu'e je Nte'yam. ¹¹Va'an tse'e je ta'axtajk dunaajk'ítjada jep kutojkun pa'tkup jetse'e ama'at du'amotunáxtat je ka'ama'yun. ¹²Ka'a xa atse'e nyakjaty jetse'e je ta'axtajk duyak'ixpáktat je yaa'tyajk ukpu duyakkutojktat, ama'ate'e y'ítut. ¹³Kux too'vajkpe'e je Nte'yam dupuujm je Adán, van'it tse'e je Eva. ¹⁴Ax je Adán, ka je'ep tse'e yakvin'aa'n, je ta'axtajke'e. Ax ku tse'e yakvin'uu'n, van'it tse'e tyokimpujk. ¹⁵Ax xoonduk joot tse'e y'íttat je ta'axtajk, je'e ve'e ku ve'e je ónuk dujajeypta jetse'e duyakye'e'kta, ku ve'e ñaajk'ítjada je jaanchja'vin maat jets je tsojkun maat, va'ajts, jetse'e tsoj yaxón jyáyuvada jyoojntykada.

**Vintso ve'e jyoointykatad pan
pan jatye'e dunuvinténidup
je jaanchja'vivatajk**

3 Tyúvam xa ya'a ve'e ya kats:
Oy xa je'e ve'e ku ve'e je jayu
dutsak jetse'e je jaanchja'vivatajk
dunuvinténat. ²Ax ve'em tse'e,
pan pan tse'e dunuvinténip je
jaanchja'vivatajk, tun vinkopkts je'e
ve'e jetse'e ti tokin kyayakpaatjat,
to'kji je ñuda'ax dujayéput,
ñay'akuvaa'najat, ñaajk'ítjut
viji kej, yakxón jyáyuvat, oy
jayu ñapyámjut maat je je'yva
jayu, je yak'ixpajkk dujátut,
³juu' jaty dumutéat, kya'oo'kut
kyamo'okjut, je jayu dukatsii'kut,
je jayu dukatso'oxpákut, je meen
dukakáxjut, ⁴dujátut vintso ve'e oy
yakkutókut jep jyuump tyujkp, jets
vintso ve'e je y'ónuk anañujoma
kajx kyatsapájkadat jetse'e
vyintsá'agajadat. ⁵Kux pan ka'a xa
ve'e dujaty vintso ve'e jep jyuump
tyujkp yakkutókut, évintsots je'e
ve'e y'o'yixjut jetse'e du'ix'ítut
je Nte'yam je jyayu joma ve'e
ñay'amókajada? ⁶Ka'ats je'e ve'e
je jaanchja'vivatajk dunuvinténat
pan pane'e tun vee'num ijtp
ku ve'e jyaanchja'vi'ukvaajñ,
kux pan ve'eme'e, to'mayji tse'e
ñamyájajat jetse'e kya'at jep
tokin jaatp jetse'e yakmooynit
je tsaachpaatun juu' ve'e xa'ma
kajx ijtnup, ve'em ax jo'n je
ko'oyjáyuvap kya'a jep tokin jaatp
jetse'e yakmooynit je tsaachpaatun
juu' ve'e xa'ma kajx ijtnup. ⁷Tun
vinkópkpats je'e ve'e jetse'e ti tokin
kyapaatuxjadat pan pan jatye'e
dukajaanchja'vidup je Jesucristo.

Kux pan yakpaatjip xa ve'e je tokin
je jayu juu' ve'e dunuvinténip je
jaanchja'vivatajk, nunjajtpe'e ku
ve'e je Nte'yam dukoo'kmutoonnit
dukoo'kmupajknit ax jo'n dupaa'ty
du'akeega jetse'e ve'em kya'at jem je
ko'oyjáyuvap kya'm.

**Vintso ve'e jyoointykatad pan
pan jatye'e patto'nidup**

⁸Nay ve'empa tse'e, pan
pane'e dupatto'nidup je jayu
juu' ve'e dunuvinténidup je
jaanchja'vivatajk, tun vinkopkts
je'e ve'e jetse'e ñaajk'ítjadat pan
vintso ve'e yakvintsá'agadat, je
jayu dukavin'aa'ndat, kya'oo'ktat
kyamo'okjadat, je meen
dukakáxjadat, ⁹jetse'e ñaajk'ítjadat
pan vintso ve'e je va'ajts vinma'yun
maat dujaanchjávadat je oy kats
je oy ayook juu' ve'e je Nte'yam
xtuknuja'vimdu. ¹⁰Va'an tse'e
too'vajkp duyakpayo'oyda pan oye'e
juu' dutonda. Ax pan ka'a tse'e ti
tokin yakpaatjada, van'ítnum tse'e
yakpámdat patto'nivada. ¹¹Nay
ve'empa tse'e je ñuda'axta, ve'em
tse'e dutsak jetse'e ñaajk'ítjadat
vintso ve'e je jayu vyintsá'agajadat,
ñay'akuvaa'najadat, dutóndat nujom
ax jo'n dupaa'ty du'akeega. Ka'a tse'e
y'akotsutoonkadat. ¹²Ax je patto'niva,
to'kjijs je'e ve'e je ñuda'ax dujayéput,
ñujávaps je'e ve'e oy vintso ve'e je
kutojkun dupámüt jep jyuump tyujkp
jetse'e je y'ónuk duyakkutojkjat. ¹³Kux
je'eda pan pan jatye'e oy yakxón
patto'nidup, yakvintsá'agadapts
je'e ve'e, makk aaj makk joot tse'e
dujayéptat je jaanchja'vin juu' ve'e
yakjayepp ku ve'e je jayu to'k muk y'it
je Cristo Jesús maat.

**Ooye'e dutunnumaja juu' ve'e
je Nte'yam xtuknuja'vimdu**

¹⁴Ntsajkpts atse'e jets ats
mitse'e tsojk najkx nku'ix. Ax
ntuknuja'yipts ats mitse'e ya
nak, ¹⁵kux pan ta'nip atse'e,
mnuja'vinuyps mits je'e ve'e vintso
ve'e dutsak jetse'e je Nte'yam je
jyayu ñaajk'itjadat, je'eda pane'e
dujaanchja'vidup je joojntyk
Nte'yam, je'eda pane'e ijttup ax jo'n
je xen jets je pats juu' ve'e tsoo'ntkp
jep naaxyp, kux yakpojtuktupe'e
jetse'e makk duyak'itta je tyuv je'e.
¹⁶Ka'a xa ve'e ñunkayakkuvákut
jets ooye'e dutunnumaja juu' ve'e
je Nte'yam xtuknuja'vimdu. Ya'ats
je'e ve'e:

Yaknuke'xnatajiki xa ve'e je
Jesucristo je jayu ni'kxax
kópka, x,
je Espíritu Santo tse'e je jayu
dutuknuja'vi jets pyaatyp
y'akeeguij je'e ve'e juu' ve'e
tyoon kyojts,
ixjüdu tse'e je ángeles,
yaknukojts tse'e joma ve'e may
itunaax,
yakjaanchja'vi tse'e yaja
naxviijn,
tsajpejntuts je'e ve'e.

**Je'eda pan pan jatye'e
dumas'o'oktap je tuv jaanchja'vin**

4 Ax je Espíritu Santo, va'ajststs
je'e ve'e du'avana jets ku
ve'e tyáminit je itakax, jem tse'e
pane'e dukoo'kjaanchja'vidinup
je tyuv je'e jetse'e dupanajkxtat
je ko'oyjáyuvap je y'ixpajkun
juu' ve'e je jayu tyukvin'aa'ndup,
²myajapám daps je'e ve'e je jayu

juu' ve'e taayidup, je jayu juu' ve'e
dukoo'ktokinja'vidinup je kyo'oy je'e
juu' ve'e tyoondup. ³Ax je jayu tse'e
va'andap jets ka'a ve'e je Nte'yam
dutsak jetse'e je jaanchja'vivatajk
je ta'axtajk ukpu je yaa'tyajk
dujayéptat, pyavaanduvap tse'e je
jayu jets jeme'e je kaaky je ju'kx
juu' ve'e kyakáydap kyaja'kxtap.
Ve'em tse'e dupava'andat óyame'e je
Nte'yam dupuujm je kaaky je ju'kx
jetse'e je kukojsun maat dukáydat
duja'kxtat je'eda pan pan jatye'e
dujaanchja'vidup je Nte'yam jetse'e
dunujávada je tyuv je'e. ⁴Kux
nujome'e juu' jatye'e je Nte'yam
pyaam, oyts je'e ve'e, ni tía ve'e
juu' ve'e nunkayakkuvákup ku ve'e
je jayu dumaa'yunjáva, ⁵kux va'ajts
je'e ve'e je Nte'yam je y'ayook kajx
jets je tsapkats kajx.

**Je'e pane'e je Jesucristo oy
dumutoomp dumupajkp**

⁶Pan mtuk'ixp xa mitse'e ya
ixpajkun je utsta je ajchta maat
je utsta je tsá'ada, oyts mitse'e
ve'em je Jesucristo xmutún
xmupuk; jets je ayook juu' ve'e
njaanchja'vimdup jets je oy
ixpajkun juu' ve'e mpanajkxumdup,
je'e tse'e mputákajap jetse'e makk
m'ijtnit to'k muk je Jesucristo maat.
⁷Ax ka'a tse'e xmajapámüt je kats
juu' ve'e je jayu myutaayvaattup
jetse'e japyayo'oy juu' dukotsta,
je'e ve'e mtónup mkótsup vintso
ve'e je Nte'yam ijtp xvintsa'agat.
⁸To'nuxjup tse'e je jayu ku ve'e je
ñi'kx je kyopk duyak'ampuk ax jo'n
tyun ax jo'n kyoo'ya, ax anañujoma
kajx tse'e je jayu tyo'nuxju ku ve'e
dútoonka vintso ve'e je Nte'yam

yakmaja yakjaancha y'ijtnit, to'nuxjupts je'e ve'e ya joojntykin kajx juu' ve'e uxyam jetse'e tyo'nuxjut je joojntykin kajx juu' ve'e miimpnum. ⁹Tyúvam xa ya'a ve'e ya kats juu' ats mitse'e nvaajnjp, pyaatyp y'akeeguipts je'e ve'e jetse'e anañujoma dujaanchjávadat. ¹⁰Je'ets je'e ve'e juu' ve'e nnu'to'numdup jetse'e je vinma'yun njayejpumda, jets je'e kajxe'e n'a'ixumda je joojntyk Nte'yam, juu' ve'e anañujoma je jayu kajxta je nutsookun duyakmiin yaja naxviijn, vinkopk je'eda pan pan jatye'e jaanchja'vijidup.

¹¹Je'e tse'e je jayu mtukpava'anup jetse'e je jayu xtuk'ixut. ¹²Ka'a tse'e pan mviijn'ixjut kux mitse'e mootsknum, je nu'ixvaatsune'e m'ítut jeja je jaanchja'vivatajk vyinkujk pan vintso ve'e mkats, pan vintso ve'e mnaajk'ítju, pan vintso ve'e je tsojkuñ jets je jaanchja'vin xjayep, jets pan vintso ve'e va'ajts mjoojntyka. ¹³Namvaat atse'e nje'ya, tukvinkótsats je jayu je Kunuu'kx Jatyán, je'e tse'e je jayu mtukka'amáydap jetse'e xtukyak'ixpáktat. ¹⁴Yakvinkopka je maa'yun je putajkin juu' ve'e je Nte'yam mmooyju ku ve'e je kya'aj mtuknu'koonjidi je'e pane'e dunuvinténidup je jaanchja'vivatajk jetse'e je Nte'yam je y'ayook dukojtsnajxti mits kajx, je maa'yun je putajkints je'e ve'e juu' kajxe'e m'o'yixju jetse'e je jayu xtuknujávát je Nte'yam je y'ayook.

¹⁵To'k aaj to'k joote'e ve'em tonu jets majapamu, ve'em tse'e anañujoma je jayu du'ixut vintso ve'e jyaa'knuyóka je y'oy je'e juu'

ve'e mtuump mkajtsp. ¹⁶Xa'ma tse'e oy x'ixut juu' ve'e mtuump mkajtsp jets juu' ve'e je jayu mtuk'ixp. Pan mtuump xa ve'e ve'em, mjayé'pup tse'e viinm je joojntykin juu' ve'e xa'ma kajx ijtp, nay ve'empa je'eda pan pan jatye'e m'amotunajxjudup.

Vintso ve'e je Timoteo ñaajk'ítjut maat je jaanchja'vivatajk

5 Ka'a tse'e je na'avtajk oyvintsova xnaajmat, ñojk'óye'e tsoj yakxón xtukvinjávát juu', ve'em ax jo'n je mtee' kuy'ijit jo'n. Ve'em tse'e je vajutyajkta xjávát ax jo'n je m'utsta kuy'ijit jo'n. ²Nay ve'em tse'e je amajatajk xjávát ax jo'n je mtaak kuy'ijit jo'n; jetse'e ve'em xjávát je kiixuta'axta ax jo'n je m'utsta kuy'ijit jo'n, je va'ajts aaj je va'ajts joot maat jets je va'ajts vinma'yun maat.

³Ixu vintso ve'e yakputákat je ku'aa'k ta'axtajk pan pane'e koo'k'ijituxjinup pan pan jatye'e putákajap. ⁴Ax pan jem tse'e je ku'aa'k ta'axtajk juu' ve'e jem je y'ónuk ukpu je y'ap je y'ok, va'an tse'e je muutskit ónuk too'vajkp je myújit jayu du'ix'itta. Va'an tse'e dutonumpijitjedinuva je tsojkuñ jets je maa'yun juu' ve'e jayejpuxjudu ku ve'e makna tsotsna vye'nada, ve'em ax jo'n dupaa'ty du'akeega ku ve'e je Nte'yam yakvinjava yakvintsa'aga, kux je'e ve'e je Nte'yam y'oyja'vip. ⁵Ax je ku'aa'k ta'axtajk pan pane'e katuntih'ijituxjup jetse'e naaydum tutyaaanni, je Nte'yam tse'e y'ajootip, jóvum xaaj jóvum tsooj tse'e dumunoo'kxtuk jetse'e chapkats. ⁶Ax je ku'aa'k

ta'axtajk juu' ve'e jem xoojntkun
 jootm naajk'ituvaajnup, óyam
 tse'e jyajoojntyka, jem tse'e
 je tokin kya'm ñaajk'ítju.
 7 Juu'ts ats mitse'e ntuknuja'yip,
 je'e tse'e mtukpava'andap je
 jaanchja'vivatajk, ve'em tse'e ti
 tokin kyayakpaatjadat. 8 Pan jem xa
 ve'e pane'e natyijjup jaanchja'viva
 jetse'e dukax'ix'it je jyayu, vinkopkts
 je'e ve'e juu' ve'e jep jyuump
 tyujkp, ka'a tse'e dukuvuk je tuv
 jaanchja'vin, nuyojk je kyo'oy je'e
 je'e ve'e ku ve'e ve'em dutún jets
 ka'a ve'e je'e juu' ve'e tyoondup
 pan pan jatye'e je Nte'yam
 dukajaanchja'vidup, y'ix'ijttupts je'e
 ve'e je jyáyuda.

9 Ku ve'e yakjavyéttat je
 ku'aa'k ta'axtajk juu' jatye'e
 je jaanchja'vivatajk pyutákadap,
 je'eji tse'e jyavyejtjadap je
 xyaaj pan pan jatye'e toogupx
 joojnt tutyákada, juu' ve'e to'kji
 je yaa'tyajk dujayeptu, 10 jetse'e
 yaknujava je y'oy je'e kajx juu'
 ve'e tyoondu, ve'em ax jo'n
 je ónuk duyakyee'kti, oy jayu
 ñapyaajmjidi maat je je'yva jayu,
 dupakpojti je Nte'yam je jyayu,
 jetse'e duputajkidi pan pan jatye'e
 tsaachpaattup, je'e ve'e ku ve'e
 nujom je y'oy je'e dutoondi.

11 Ax ka'a tse'e yakjavyétut
 je ku'aa'k ta'axtajkta juu' ve'e
 dukatajkipna toogupx joojnt. Kux
 ku xa ve'e je yaa'y kax dujayepta,
 ka'a tse'e du'ukkuvajktini juu'
 ve'e vyaajntktu vintso ve'e
 dumutóndat dumupáktat je Cristo,
 yaa'vyakvaandinuvape'e. 12 Ku ve'e
 ve'em dutonda, tukkuvéjtjadaps
 je'e ve'e je Nte'yam je'e kajx

ku ve'e dukakutyonda juu' ve'e
 ñu'atso'vidu. 13 Nooxjajttup tse'e
 kuxe'e je tyoonk kya'ijtuxjada, ax
 ka nooxjyap tse'e, tajkm tajkme'e
 tyajkiduva jetse'e y'akotsutoonkada,
 dutuktákada juu' ve'e kapaatjudup,
 jetse'e jyomva'anda tyiva'anda.
 14 Je'e kajxts atse'e ntsak jetse'e
 je muutskit ku'aa'k ta'axtajk
 yaa'vyajktinuvat, je ónuk
 dujayeptat, jetse'e je yaaaj je
 tyajk du'ix'íttat. Ax ve'em tse'e
 kya'o'yixjadat vintso ve'e je tokin
 xpaatjimdat ya'a kajx je jayu juu'
 ve'e dutso'oxpajktup je Nte'yam.
 15 Kux jeme'e je ku'aa'k ta'axtajk juu'
 ve'e je tuvutoo' dumasooktu jetse'e
 je Satanás dupanajxiti.

16 Pan jem xa ve'e je jaanchja'viva,
 je yaa'tyajk ukpu je ta'axtajk,
 jetse'e jem je jyayu juu' ve'e ku'aa'k
 ta'axtajk, va'an tse'e duputákada,
 ve'em tse'e je jaanchja'vivatajk
 kyatso'oxjajtuxjadat jetse'e
 y'o'yixjadat jetse'e duputákadat je
 ku'aa'k ta'axtajkta pan pan jatye'e
 katuntih'ijtuxjudup.

17 Je jayu pan pan
 jatye'e dunuvinténidup je
 jaanchja'vivatajkta, je'e tse'e
 yakmo'odap nuyojk je vintsa'kin
 jets je putajkin, vinkopk je'eda pan
 pan jatye'e ka'amaaydup jetse'e
 yak'ixpakta. 18 Kux jidu'ume'e
 je Kunuu'kx Jatyán vya'añ: “Ka'a
 tse'e je y'ajén xpaajmjat je tsapkaaj
 juu' ve'e duintee'mp je trigo.”
 Vaampap tse'e jidu'um: “Je toompa
 jayu, vyinmajtsjupts je'e ve'e jetse'e
 yakmujóyut.” Jidu'um tse'e vya'añ.

19 Ka'a tse'e xmajapámüt je
 jayu juu' ve'e dunu'aa'nip ukpu
 dunuvampejtp to'k je jayu juu' ve'e

dunuvinténip je jaanchja'vivatajk, van'ítnume'e pan jeme'e numejtsk ukpu nutoojk juu' ve'e dunukojtspejtup je y'ayook. ²⁰Ax je jayu juu' ve'e dunuvinténidup je jaanchja'vivatajk jetse'e tyokintonda, mtuknaajmap tse'e jeja anañujoma je jayu vyinkujk, ve'em tse'e je viijnk jayu cha'agadat jetse'e ve'em kyajátkiduvat. ²¹Je Nte'yam jets je Jesucristo maat je y'aangeles, jéjats ats mitse'e je'e vyinkujkta ntukpava'añ jets ya'a ve'e xkutyónut. Ni to'k ni jado'k tse'e xkaviijn'íxut. ²²Payo'oyu oy pan pane'e oy du'ix'ijttup je Nte'yam je jyayu, van'ítnum tse'e je mka'aj xtuknukónut. Kux pan mtuknukaampe'e je mka'aj je jayu juu' ve'e duka'oy'ix'ijttup je Nte'yam je jyayu, mtukpaatjupts mits je'e ve'e je tyokin. Va'ajtsts mitse'e mnaajk'íttut.

²³Je'e kajx tse'e kuxe'e vane'em mpukju jetse'e je jotpa'am xjayep, kádits tun je tsoxk naajji x'uu'k, ookpa ve'e vee'n je tsaaydum pa'ajk naaj.

²⁴Je'e kajx tse'e payo'oyu oy kux jeme'e juu' ve'e ixna ke'xna tokintoondup, ka'a tse'e vyinkopka jetse'e je viijnk jayu oy dupayo'oyut jets ka'a je'e ve'e y'oya juu' ve'e tyoondup. Jempa tse'e pane'e je tyókinda kanuke'xnatajkíp jatyji, ux'oooknume'e. ²⁵Nay ve'empa tse'e, yaknuja'vivap xa ve'e juu' ve'e je jayu oy tyuump. Ax pan ka'a tse'e jatyji yaknujava, ux'oooknum tse'e yaknujava. Ka'a xa ve'e juu' yu'uts ñaxy.

6 Nujom pan pan jatye'e mutoondup, va'an tse'e

dúvintsa'agada je vyintsanda, ve'em tse'e je Nte'yam kyayakvinkojtspétut jetse'e je jayu dukapakótsut je n'ixpajkunamda. ²Ax pan je jaanchja'viva jáyuts je'e ve'e je vyintsanda, ka'a tse'e duyakvintsa'kintókidat je vyintsanda kux y'utsta y'ajchta je'e ve'e, nuyojk oye'e dutoojnadat juu' ve'e oy, kux je vyintsanda, pyutajkidupts je'e ve'e pan pan jatye'e yaktsojktup jetse'e je Jesucristo dujaanchjávada. Tukyak'ixpaku ve'em je jayu jetse'e ve'em xtukka'amáyut.

Je tuk'o'yin jets je tukjotkadaakun

³Pan jem xa ve'e je jayu juu' ve'e dutuk'íxtup je viijnk ixpajkun jetse'e dukakuvakta je va'ajts ixpajkun juu' ve'e je Maja Vintsán Jesucristo jye'e, je va'ajts ixpajkun juu' ve'e dumaatnavyaatjup dumaatnay'akeeguijup je Nte'yam jye'e, ⁴ka'ats je'e ve'e dutinujávada, namyájijidup je'e ve'e, je'ejyji ve'e tyoonkidup juu' ve'e je jayu natyukkojtsvintsoojvup. Ax ku tse'e je jayu ñakyojtsvintsávju, je'e tse'e duyakjéjip je ejkun, je tso'oxpajkun, je vinkojtspejtun, je ko'oy vinma'yun, ⁵ka'a tse'e ñayjávajada je jayu. Ka'a xa ve'e y'oya je vyinma'yunda pan pane'e ve'em játkidup, ka'a tse'e dunujávada je tyuv je'e, ve'eme'e vyinmayda jets je y'avintso o'yin je'e ve'e ku ve'e je jayu je Nte'yam dvinjava dúvintsa'aga. ⁶Ax maja o'yints je'e ve'e ku ve'e je jayu je Nte'yam dvinjava dúvintsa'aga, je'e ve'e ku ve'e yaktukjotkada'aky vinxupe'e juu' yak'ix yakjayep. ⁷Ni

tía xa ve'e nkayakje'yumdi yaja naxviijn ku ve'e nke'xumdi, ni tía tse'e nkayaktsoo'numduvat ku ve'e n'oo'kumdinit.

⁸Ax pan njayejpumdup tse'e je kaaky je naaj jets je vit je xox, ntukjotkadaakumdapts uu'm je'e ve'e. ⁹Je'e pan pan jatye'e naajkkumeenavaajnjudup, ka'ats je'e ve'e cho'oxa vintso ve'e kya'adat jep tokin jaatp, y'ajootidup tse'e may viijn juu' ve'e ka víjap ka kéjap jets juu' ve'e yaktokintoojnjudup. Ax je'e tse'e je jayu duyakma'tp jetse'e dutukmasa'ak je Nte'yam je tyoo'. ¹⁰Ku xa ve'e je jayu duna'sayova je meen, je'ets je'e ve'e duyakjéjip je ko'oy vinma'yun jets je ko'oy to'nun. Jemda tse'e juu' ve'e je tuv jaanchja'vin dukoo'kmajapaaminup kux ooye'e dutuntsokta jetse'e kyumeenadat, ve'em tse'e tyoo'tókida jetse'e je jyoot je jya'vin ooy tyunyaktsaachpaa'tjada.

Ku je kyo'oy je'e yak'amaadaaga

¹¹Ax mits, je Nte'yam je jyayu, ka'a tse'e x'itumō'ot ya ko'oy too'; je'e ve'e mtónup mkótsup je tyuv je'e, vinjava vintsa'aga je Nte'yam, jayepu je jaanchja'vin jets je tsojku, mutena juu' jaty, naajk'ítju nuu'k aaj nuu'k joot, ¹²jets amaadaaga je jaanchja'vin kajx je kyo'oy je'e. Tun'ixu vintso ve'e xjayejpnit je joojntykin juu' ve'e xa'ma kajx ijtp, je'e juu' ve'e je Nte'yam mtuknyaauxju jets juu' kajxe'e je tuvakojsun oy xpuujm jeja je numay jayu vyinkujk, je'ets je'e ve'e ku ve'e mnay'ava'niji vintso ve'e mjaanchjáva.

¹³Je Nte'yam, juu' ve'e je joojntykin duyajkp, jets je Jesucristo, juu' ve'e jem je Poncio Pilato vyinkojkm oy je tuvakojsun dupaam, jéjats ats mitse'e je'e vyinkujkta ntukpava'añ ¹⁴jetse'e xkutyónut je toonk juu' ve'e je Nte'yam mmoojyju, ve'em tse'e je jayu va'ajts dunujávat jets pan ti je'e ve'e je tokin jetse'e ñaajk'ítjadat oy jets va'ajts. Tonu ve'em van'it paat ku ve'e myiinnuvat je nMaja Vintsánamda Jesucristo. ¹⁵Ax miinnuvapts je'e ve'e, ve'em ax jo'n dunupaajmtki je Kunuu'kx Tee', je'ejyji ve'e nujom juu' jaty duka'mikajxp, je Yakkutojkpa juu' ve'e duyakkutojkjip je yakkutojkpatajk jets je Vintsán juu' ve'e dunuvintsánip je vintsántajk. ¹⁶Je'e xa ve'e tun to'kji juu' ve'e duka'mip juu' jatye'e kavintókip, joojntykipts je'e ve'e jeja ajajtk it jaat joma ve'e ni pana kyanaajktámaja. Ni pana xa ve'e kya'ixju, ni pana xa ve'e kya'o'yixju jetse'e y'íxjut. iJe'e tse'e xa'ma kajx dunumájinup dunujaanchinup jetse'e je kutojkun dujayejpnit! Amén.

¹⁷Naajmada pan pan jatye'e kumeenda yaja naxviijn jets ka'a ve'e ñamyájajadat jets ka'a ve'e jem je meen kya'm ñapyámjadat, kux ka'a ve'e dunujávida vinxupe'e ya it jyaa'knáxut ku ve'e dujaa'kjayéptat je myeen, ñojk'óye'e jem je Nte'yam y'am kya'm ñapyámjadat, je'e juu' ve'e ooy xtunmō'yumdup nujom juu' jaty je'e kajx jetse'e ntukxoojntkumdat. ¹⁸Naajmada jetse'e dutóndat juu' ve'e oy jets juu' ve'e y'íxtup

jyajejptup, je'e tse'e tyukputákadap
 je viijnk jáyuda. ¹⁹Ku tse'e ve'em
 dutóndat, y'apaamdúkadapts je'e
 ve'e juu' ve'e miimpnum jetse'e
 duyakvinkópkadat je joojntykin juu'
 ve'e xa'ma kajx ijtp.

Juu' ve'e je Pablo

tyukpavan'ux'ookinu je Timoteo

²⁰Timoteo, va'ajts tse'e
 xyak'ítut je oy kats je oy ayook
 juu' ve'e myaktukkatajki. Ka'a

tse'e x'itumo'ot jetse'e jyéjat
 je ko'oy ayook jets je kats juu'
 ve'e tyijtup nuja'vin, ax ka'a
 tse'e je kats dumaatnavyaa'tyju
 dumaatnay'akeegaja je Nte'yam
 je y'ayook. ²¹Jeme'e je jayu juu'
 ve'e ve'em yak'ixpajktup, ve'eme'e
 vya'anda jets y'ixada ve'e je
 Nte'yam; ax ka'a tse'e du'ixada,
 myasooktinuts je'e ve'e je tuv
 jaanchja'vin.
 Je Nte'yam tse'e mkunoo'kxjup.